


# Noua e l'aua?

Egn mystery davart igl tema  
**(stgarseztga d')** aua

Ziclus 2

Versiùn 1.0



# Impressum

**Tetel:** Noua e l'aua? Egn mystery davart igl tema (stgarseztga d') aua, ziclus 2

**Cuntegn:** Sustegn par parsùnas d'instrucziùn. Figls da lavur a tgartas da mystery par scularas a sculars

**Publicatura:** éducation21

**Autura:** Silvana Sachs a Samirah Hohl (Parc natural Bavregn), Angela Thomasius (éducation21)

**Translaziùn:** Leia Rumàntscha

**Cuntegn a layout:** Silvana Sachs a Samirah Hohl (Parc natural Bavregn)

**Copyright:** éducation21, Berna, zarcladur 2024

**CC-lizenza:** CC BY NC ND

**Fotografeia:** Frontispezi dutg sen l'alp Curtginatsch, Parc natural Bavregn, Samirah Hohl; Cartas da mystery 1 a 2 ZHAW, Simone Gruber; 15, 16, 26 Pixabay; ulteriuras fotografeias Parc natural Bavregn

## Ulteriuras infurmaziùns

Agentura Parc natural Bavregn, Center da Capricorns, Veia Cantunala 51, CH-7433 Vargistagn  
[www.naturpark-beverin.ch](http://www.naturpark-beverin.ch), [info@naturpark-beverin.ch](mailto:info@naturpark-beverin.ch), 081 650 70 10

éducation21, Monbijoustrasse 31, 3001 Berna  
[www.education21.ch](http://www.education21.ch), [info@education21.ch](mailto:info@education21.ch), 031 321 00 22

# Introducziùn

**Grupa an mira:** 2. ziclus (davent da la 5. classa)  
**Durada:** 3-4 lecziùns

## Conex cugl plan d'instrucziùn 21

Las scularas ad igls sculars...

- NUS 2.2f: ...san meter an relaziùn a structurar diferaints fenomens a caracteristicas partutgànt: sulegl/glisch, aria, calira, aua, taratsch, crappa sco ear declarar a classifitgear las ancunaschientschas fatgas an que conex. fenomens a caracteristicas: transfurmaziùn, radiaziùn da glisch, radiaziùn da calira, stgòldamaint a sfardantada, svapuraziùn a condensaziùn; aua a zirculaziùn da l'aua; structuraziùn da stresas digl taratsch.
- NUS 2.2g ...san persequitar amparadas spezificas davart influenzas a conex da basa naturalas par la moda da viver dad animals, plàntas a carstgàns, procurar infurmaziùns vetier, interviewar parsùnas digl fatg sco ear urdanar, caracterisar a declarar resultats ad ancunaschientschas.
- NUS 2.6h: ...san giuditgear consequenzas pussevlas da las influenzas digl carstgàn sen la natira, san cumbinar ancunaschientschas vetier a san reflectar davart las atgnas modas da sacumportar a d'agir.
- NUS 4.4, 2c: ...san observar ad identifitgear fastezs d'evenimaints da la natira agls agens conturns, far suposiziùns tge c'e capito, sco ear giuditgear tge c'e an cas da periclitar a proteger igl carstgàn (bova prehistoric da Flem, lavegnas, aua grànda agl Puschlav, schaladas permanentas).
- NUS 6.3d: ...san descriver a preschantar a mèn d'exaimpels igl prozess da la producziùn da roba (p.ex. digl petroli tigls legos).
- NUS 8.3b: ...san perzepir, descriver a patartgear, co c'igls carstgàns transfurman a midan igls noss conturns ad igl noss spazi da viver p.ex. antras igl abitar, la producziùn da nutrimaint, igl easser par veia, la conzepziùn digl tains liber.

## Cumpetenças transversalas

- Partartgear interdisiplinar: (...) Relaziùns, dependenzas ad efects reziprocs trànter carstgàns, diferaints spazis da la sozietad sco ear igl ambiaint natural (...) analisar a capir.
- Duvrar infurmaziùns: Ancurir, valitar a preschantar infurmaziùns.
- Capavladad da dialog a cooperaziùn: Discutar cun carstgàns a luvrar anzemel.
- Schliear problems/leztgas: acquistar strategieas d'amprender, planisar prozess d'amprender a da luvrar, manar atras a reflectar.

## Tge e egn mystery?

Egn mystery e egna furma d'amprender, ca promova igl partartgear interdisiplinar cun la fegnamira da capir relaziùns complexas digl mintgagi a da las reflectar. Igls mysterys sustegnan egn amprender oriento a problems. Las scularas ad igls sculars activeschan lur presavida cun atgnas experienztgas, erueschan novas funtànas d'infurmaziùns, anquieran relaziùns ad amprovan da trer conclusiùns. Latier vignan pussibilitos agens patratgs tier egn tema. Par regla dat igl differaintas schleiaziùns par raspunder l'amparada directiva.

**Utilisaziùn:** A l'antscheata digl decurs da l'instrucziùn par registrar igl livel d'amprender (presavida) near a la fegn par saprofundar a controlar quegl c'e vagnieu amprieu.



## **Elemaints digl mystery**

- Mussaveia par la realisaziùn an l'instrucziùn cun egn'istorgia d'introducziùn ad egn'amarada directiva
- Models da cuptgear par las scularas ad igls scularas: Set cun 30 tgartas d'infurmaziùns, lavur an grupa, schurnal d'amprender
- Infurmaziùns cumplementaras par la parsùna d'instrucziùn incl. material par saprofundar a schleiasiùn d'exaimpel
- Sco opziùn videos tigl manaschi d'alp sco infurmaziùns cumplementaras par scularas a scularas a la parsùna d'instrucziùn

## **Fegnamiras**

Las scularas ad igls scularas...

- Identifitgeschan relaziùns trànter igl manaschi d'alp, la midada digl clima a las resursas d'aua agl context local a global.
- Safatschaintan cun l'aua ord perspectiva economica, ecologica, soziala a parsunala ad amprendan d'ancanuscher diferaints acturs.
- Parcorschian opziùns d'agir par egna relaziùn atenta cun l'aua an lur mintgagi.

# **Realisaziùn**

## **Preparaziùn da la parsùna d'instrucziùn**

- Squitscheiar par tut quels c'amprendan egna copeia digl «schurnal d'amprender»
- Preparar par mintga grupa da tres near da quater egna copeia da «lavur an grupa», egn set cun 30 tgartas d'infurmaziùns, egn figl da flipchart, fleters, fils, forbesch a tatgatut/cola par tatgear sei las tgartas.
- Determinar igl spazi da tains.
- Sco opziùn preparar egn beamer/smartboard cun videos.

La fegnamira da la metoda da mystery e, ca diferaints temas vignan mess an relaziùn l'egn cun l'oter. Dantànt ston betga tut las infurmaziùns vagnidas profundidas a capidas digls SaS par saver raspunder l'amarada directiva. Plenavànt san igls temas ear easser egn impuls par la preparaziùn near evaluaziùn d'egna unitad d'instrucziùn:

<i>Economeia d'alp, mintgagi d'alp</i>	<i>Ramaglieaders</i>	<i>Zonas da vegetaziùn</i>	<i>Consequenzas da la midada digl clima</i>
<i>Subvenziùns federalas</i>	<i>Palés</i>	<i>Aua suterana</i>	<i>Cultivaziùn sen tres livels</i>
<i>Producziùn da Pavel par animals da nez</i>	<i>Tgaglias sen pastiras</i>	<i>Generatur da diesel</i>	<i>Ovras electricas (pintgas)</i>



## Dacurs da l'instrucziùn

Cuntegn	Basegns da tains
1. La parsùna d'instrucziùn (PI) preschainta l'istorgia d'introduciùn near lascha preliger ella. Ella sclarescha pleuds nunancunaschaits (p.ex. CO2) a fa l'amparada directiva, sainza tradir igl tetel digl mystery. La PI fa atenta, ca la fegnamira prinzipala e la rasposta a l'amparada directiva. Sco opziùn san vagnir vurdadas sequenzas da videos par egn'investa agl manaschi d'alp.	5 min. (opziunal + 15 min.)
2. Las scularas ad igls scularas (SaS) remnan agl plenum ampremas suposiziùns davart raspostas pussevlas (sclarir la presavida). La PI documentescha las suposiziùns par c'ellas san vagnir cunfirmadas, cumpletadas near curageadas a la fegn. Igls SaS nodan lur suposiziùns agl schurnal d'amprender (amparada 1)	10 min.
3. An grups da quater den igls SaS ampruar da raspunder l'amparada. Par far quegl survignan els las tgartas d'infurmaziùns, egn pulpier da flipchart, fleters a tatgatut near cola. Els studegian las tgartas ad amprovan d'ordinar elllas segl flipchart a da rapreschantar relaziùns. La PI fa tut tanor basegns atenta c'igls SaS dastgan determinar egn'atgna logica a structura a ca betga tut sto easser linear. Eventualmeing vignan noziùns nuncleras declaradas a visualisadas.	40 min.
4. Tut igls SaS nodan lur schliaziùn(s) agl schurnal d'amprender.	5 min.
5. Las grups preschaintan lur schliaziùn(s) avànt la classa, incl. argumentaziùns a declaraziùns co c'els en suczedieus / tge strategieias c'els ân tscharchen. Suainter savunda egna discussiùn davart las diferaintas pussevladads da schliaziùn ad egna cumparegliaziùn cun las suposiziùns da l'antescheata cun la PI sco manadra da la discussiùn (refleksiùn da la moda da prozeder, da la strategieia da schliear egn problem tscharchen, la valitaziùn a giudicat da la lavur sco ear igl efect d'amprender an general cugl agid digl schurnal d'amprender).	30 min.
Basegns da tains puncts 1-5	
6. Sulet near an dus raspundan igls SaS l'amparada 3 «Tge ve jou amprieu?» an lur schurnal d'amprender.	15 min.
7. An lavur singula studegian igls SaS, tge contribuziùns c'els savessan porscher par ir anturn agl mintgagi cun la mancàenza d'aua a nodan quellas an lur schurnal d'amprender.	15 min.
8. Anzaquàntas pussevladads d'agir vignan preschiantadas agl plenum a la realisabladad vean discutada. La PI aschunta ulteriuras opziùns d'agir pigl migliuramaint da la situaziùn (cumpareglia infurmaziùns cumplementaras).	25 min.
9. Igls SaS cumpletechan an lavur singula near an grups da dus l'amparada 4 digl schurnal d'amprender partutgànt las pussevladads d'agir amprandidas.	5 min.
Basegns da tains puncts 6-9	

Igls puncts 1-5 den vagnir prieu atras an la madema lecziùn. Igls puncts 6-9 san ear vagnir elavuros an egn mumaint ple tard near punctual (p.ex. integrar an las leztgas).

### Opziùn: La sequenza da film «Ein Alpsommer» / «L'été à l'Alpage» digl agid svizer par la muntoagna

Igls films curts datan egna investa a quels SaS c'ân ànc mena fatg experienztgas sen egn'alp, co la veta sen l'alp Curtginatsch veza or. La seria 3 mussa, co igl mulscher a la pastreglia suczedan. La seria 4 dat egn'investa agl caschar.

- Tudestg: <https://youtube.com/playlist?list=PLRgA9f7xF4CUchN49YObGSiXe9Ry9-pA2&feature=shared>
- Franzos: <https://youtube.com/playlist?list=PLRgA9f7xF4CUXOdmFLnfhiAiUVEBVD4KU&feature=shared>



## Istorgia d'introducziùn

Igl gi leava ad igl fa plànsieu gis sen l'alp Curtginatsch. Agls bietgs e'gl dantànt tut stgir. Sch'igls luvraints ân durmieu giou oz? Tutanegna schlupeg'igl dadòlt davo igl nuegl ad egn pintg nivel da fem aszenda. Igl schlupagear samida an egn rumplanar a las cazolas an la tigia d'alp s'anvidan. Schon prest antscheva la producziùn da latg a da caschiel.

La sagnùna Janine ad igl pastur Marc en leads, c'els ân avunda forza electrica pigl manaschi d'alp. Mo igl eara betg adigna ascheia c'els vevan da far diever d'egn generatur da diesel ca fa canera a tofa. Antocen la stad passada â egna pintga ovra hidraulica agl dutg pussibilito la producziùn da forza electrica CO<sub>2</sub> neutrala. Ussa cura dantànt bunameing nign'aua ple. Egn dutg setg stat dantànt betga me an relaziùn cun la producziùn da forza electrica, mo fuss ear igl motiv partge c'igl Laurin savess betga ple cumprar igl sieus pànet preferieu cun caschiel d'alp an la pastarnareia Merz a Cuira.

## Amparada directiva

Noua e l'aua a partge savess igl Laurin betga ple cumprar igl sieus pànet cun caschiel d'alp, sch'igl dutg sen l'alp Curtginatsch tschassass?



# Infurmaziùns par parsùnas d'instrucziùn

## Influenza da la midada digl clima sen auas


Igl stgòldamaint global influenescha fetg las resursas da l'aua. L'antiera purschida d'aua an Svizra vean probablameing betg a samidar dezisiv antocen la fegn digl tschantaner, dantànt vignan las prezipitaziùns a distribuir oter sur igl on.

An la Svizra vignan las stads adigna ple setgas, igls unvierns tendenzialmeing ple tgòlds a cun adigna dapse plievgia ca nev. Ascheia crodan plievgias, c'amplaneschan igl livel da l'aua suterana, agl futur pletost igl unviern ca da stad. Anstagl ca las prezipitaziùns d'unviern vignan arcunadas an furma da nev, cura l'aua da plievgia sur flems directameing puspe or da la nostra regiùn an regiùns bassas. Ear l'augmantaziùn da la temperatura vean a far ca la luada da nev, c'e mademameing fetg impurtànta par la fumaziùn da l'aua suterana, â liac ple bòld agl on.


Tut quels puncts magnan tier quegl, c'igl stat a disposiziùn dapse aua duvrevla d'unviern a da parvavera, dantànt ear ple poca da stad a d'atun. Las midadas dascretas ân ear consequenzas segls defluents da curants d'aua, tge ca sa schar siear or near sbassar igls livels d'aua da lais ca vignan betga regulos.

Antras la lieua da sglatschers vignan adigna dapse zonas òltas an las alps curvatadas da vegetaziùn. Las consequenzas: Igl verd an las muntognas fa reflectar ple poca glisch digl sulegl. Quegl fa ca la surfatscha da la teara sastgòlda ple speart a ca la nev agls sglatschers lieuan ple dabot. Plenavànt saspostan las zonas da vegetaziùn a da fauna adigna plenansei (p.ex. igl cunfegn digl gòld) a las spezias ca vivan senzum vignan scatschadas.

La midada digl clima â mademameing egn'influenza sen l'economeia da l'aua: Igs carstgàns ston midar lur utilisiùn da l'aua, cunquegl ca l'explotaziùn da l'aua da bever, l'anzuada, la producziùn da forza electrica a la producziùn da calira near sfardamaint vignan par part a cuntànscher lur cunfegns. Els ston pasar diever a gudogn l'egn ancùnter l'oter, par c'igls sistems ecologics vignan betga surcargieus. Tigl schurmetg ancùnter auas gràndas dovr'igl mademameing adataziùns agl avagnir.



Bildnachweis: eigene Darstellung mit Daten aus Brunner et al. (2019c)



Quelle: Schweizer Gletschermessnetz GLAMOS

## Manaschis d'alp an la Svizra

Zirca egn tearz da las planiras agraras an Svizra en teritoris d'alp. Sco alp quentan an la Svizra pastiras c'en piglple sur igl cunfegn digl gòld a ca vignan cultivadas me da stad. Sco egn'impurtànta part da la da cuntrada culturala da la Svizra vignan quellas planiras mantanidas antras la cultivaziùn, anstagl c'ellas creschian aint a la



biodiversitat stotgi pitir. Las pastiras portan plenavànt ¼ digl Pavel da basa digls manaschis purils. Ascheia san las pastiras an la valada vagnir livgeadas durànt igl tains d’alp a vagnir duvradas p.ex. par far aint igl fagn existentialpigl unviern. Par ca quegl setgi gartagear ston pasturs easser prùnts da prastar egnà grànda lavour, cunquegl c’els lavuran da zirca las 4.00 uras antocen las 21.00 uras a fan ir near van par la biestga sen la pastira a mulschan las vatgas par far igl caschiel or digl latg.

Par c’igl sa vagnir fatg gudogn, en pajas directas da la cunfederaziùn nezessarias: Igl manaschis an la valada survegnan cuntribuziùns d’alp, par c’els radin ear anavànt lur animals se d’alp. Peia e l’economeia d’alp egn faktur economic impurtànt pigls manaschis purils locals, cunquegl c’els cuntànschan antras quegl radund 30% da lur antradas.

La stadageada vala ear sco faktur ecologic impurtànt: Sainza la vasta tratga da biestga fussan pastiras an regiùns muntagnaradas carschidas aint cun tgaglias a pegns. Antras quegl nassan cuntradas culturalas cun egnà grànda diversitat da plàntas an flur, sco ear egnà part digl spazi da viver da tgamutschs, muntanealas ad oters animals d’alp a pearder. Ultra da quegl san me ramaglieaders sco vatgas, nursas near tgoras tuagear las earvas sen las pastiras, ascheia c’els san nutrit igls carstgàns cun latg, caschiel a tgarn. Cun lur grasha ledan els las pastiras d’alp a maniera naturala a livgeschan antras quegl igls manaschis da la valada an sia bilàntscha da ladar. Par ca quella cultivaziùn a tgira da las planiras alpinas sa vagnir sustanida, survean igl manaschi d’alp contribuziùns da stadageada da la cunfederaziùn.

## **La situaziùn d’aua an las alps da la Svizra**

Egn’alp e sper igl mantegnamaint digl mintgagi digl parsunal d’alp ear dependenta da l’aua disponibla: Egnà vatga da latg beva par exaimpel antocen 100 liters aua. Par la producziùn d’egn kilogram caschiel dovr’igl 10'000 liters aua. Pastiras verdas ad anvidàntas en igl nutrimaint da basa digls animals. Quellas creschan me, sch’ellas ân avunda aua (prezipitaziùn)

Adigna daple manaschis d’alp an la Svizra ân da cumbater cun la mancàenza d’aua parve da la setgira da stad, tge c’â la consequenza ca funtànas a turvaschs siantan. Scha quegl capeta, sto vagnir procura oter par l’aua: Antocen ussa à savens survieu egn helicopter near l’atgna forza digl tgierp par transpurtar l’aua custevla se d’alp. Pigl avagnir dovr’igl peia reservoirs d’aua ple grànds, ca san agl cass ideal vagnir partgieus cugls manaschis vaschegns.

Ear blearas tigias digl club alpin svizer (CAS) piteschan da la mancàenza d’aua. Sch’igl dat egnà stad setga schleian els que problem temporarmeing cugl diever da l’aua luada digl davos unviern near da l’aua da plievgia.. A lùnga vesta vignan amaduas pussevladads dantànt adigna ple raras. Parquegl ân guessas tigias gea prieu masiras da raziunar: an la tigia Konkordia agl teritori digl Aletsch sto par exaimpel vagnir cumpro egnà buteglia aua minerala par lavar igls daints.


## **L’alp Curtginatsch**

Segl manaschi da l’alp Curtginatsch agl vaschinadi Muntogna da Schons agl cantùn Grischùn, sto l’aua da funtàna vagnir transformada an aua da bever (la higiena vean controlada anualmeing), avànt c’ella vean duvrada par la producziùn da caschiel a par bever. Agl contrari cun ple bòld dovrà l’alp Curtginatsch oz, sco mintga manaschi d’alp, forza electrica par mulscher, par produtgear caschiel sco ear agl mintgagi digls sagnùns a las sagnùnas. Egna aplicaziùn da ple bòld e dantànt ànc la madema: Igl schinumno “Dampfkessi” pussibilitescha, ca l’aua par la producziùn da caschiel sa vagnir scaldada cun fiac a sainza forza electrica.

Davent da zirca 30 ons – davent ca la mulschera mobila presta sia lavour – e’gl nezessari da duvrar sper egnà pintga ovra electrica d’aua egn generatur da diesel, parquegl ca las turbinas d’aua tànschan betga ple da produtgear avunda forza electrica durànt igl prozeder da mulscher. Durànt la stad setga igl on 2022 e schizund vagnieu duvro me igl generatur da diesel, parquegl ca la turbina veva megna poca aua par saver produtgear forza electrica.



Igl carburànt fossil porta antras igl CO<sub>2</sub> dantànt tier agl scaldamaint digl clima. Iglis moleculs da CO<sub>2</sub> absorbeschan egn part da l'energeia (=calira) digl sulegl da la teara a repartganella sen la surfatscha da la teara. L'energeia digl sulegl, ca vean tanida an l'atmosfera da la teara parve da las emissiùns da gas cun efect da seara (Treibhausgasabstoss), prenda tier a cun quegl ear igl scaldamaint digl clima.



Scha radis digl sulegl vignan an l'atmosfera, vignan els reflectos da la surfatscha da la teara a saros aint digl gas cun effect da seara. Ascheia sastgòlda la teara (Grafica: Parc natural Bavregn)


### **Novas schleiaziùns par ir anturn cun stretgas da forza electrica**

Sco dascret agl capetel «influenza da la midada digl clima sen l'aua», magna la midada digl clima an la Svizra tier egn mancàanza d'aua da stad. Quegl e betg agl sen da l'alp Curtginatsch, cunquegl c'igl magna ear tier egn mancàanza da forza electrica. Parquegl e vagnieu realiso la stad 2023 egn project da pilot. Igl project â examino egn nov sistem pigl provedimaint da forza electrica cumplet antras la pintga ovra hidraulic. Nov e, ca la forza electrica produtgeada cun la turbina d'aua sa vagnir salvada an egn batareia, ascheia ca la forza electrica tânscha par egn antier gi. Suainter egn prozess complex cun blearas modificaziùns ad adataziùns digl program, e igl project da pilot ieu a fegn cun egn bilàntscha positiva: La fegnamira da betga stuer duvrar igl generatur da diesel la stad 2024 e peia damanevla. Stuess igl tuteagna vagnir tier mancàanzas an la producziùn da forza electrica, preveza igl project egn indrez solar. Ascheia sa l'alp Curtginatsch agl avagnir ratrer da beals gis la forza electrica digl indrez solar a durànt las fasas da plievgia sa la forza electrica vagnir ratratga da l'ovra hidraulica pintga.

Sch'igl dess agl futur sco spitgieu adigna ple stedias mancàanzas da'aua durànt la stad, savess igl vagnir ple greav. Da cuz curt near masàn fan igls colavuratur da l'alp Curtginatsch ànc nigns quitos. Duess igl dantànt capitär, ca la funtâna d'aua svaness digl tutafatg, fuss egn scargeada d'alp (return da la biestga agls manaschis an la valada) la consequenza par blearas alps, cunquegl ca l'aua mancass pigl tarschinar, forza electrica, bavraduirs, la pastreglia, a.a.a. Quegl manass dantànt puspe tier gràndas spearsas an la producziùn. Iglis manaschis d'alp ân safurmo par livgear las pastiras an las valadas. Vagnessan quellas fulanadas an egn cass



d'egna scargeada, dess igl ple poc plaz da far fagn, la producziùn da fagn davantass ple pintga a cun quegl dess igl alura ear ple poc pavel indigen.



Survesta geografica: Cotschen: Manaschi d'alp Curtginatsch. Blau: Auas. Rosa: Inventar federal digl teritorì da palé Anarosa. (funtàna: map.geo.admin)

## Propostas da schliaziùn da schinagear las resursas d'aua sen l'alp

Cunquegl c'igls manaschis d'alp ston sapreparar, ca las resursas d'aua en a lùnga vesta betga ple disponiblas sco antocen ussa, dovr'igl propostas da schliaziùn. Pussevladads usitadas en par exaimpel da rimnar aua da plievgia near aua luada an zisternas a dad ir anturn agl mintgagi ple spargnus cun l'aua. Scha quegl e la migra schliaziùn a lùnga vesta, vean ànc a samussar.

Egn transport d'aua cugl helicopter e bunameing nunpussevel sen egn'alp da biestga, cunquegl c'igl vean duvro megna bleara aua. Egna pussevladad fuss da far diever da las funtànas, ca portan bleara aua anturn igl teritori da palé. La «cuntrada da palé da l'alp Anarosa» e dantànt egna zona da schurmetg da la natira\*, tge ca cumplingescha la lubientscha da duvrar quellas funtànas. Scha l'aua vean ratratga d'egna cuntrada da palé, va antras la setgantada dad egna vart ear a pearder igl spazi da viver periclitò, a da l'otra vart vignan liberos blears gas cun efects da seara, c'en saradas aint an las palés.



\*Inventar da la federaziùn da las cuntradas da palé cun egna balteztga speziala a muntada naziunala (ufezi federal d'ambiaint BAFU)

Ulteriuras ideias ca savessan vagnir utilisadas sen manaschis d'alp a ca vignan par part gea examinadas, vignan numnadas savundàntameing:

- Me duvrar funtànas ca porschan avunda aua. Scha la funtàna sacatass sut l'alp, savess l'aua vagnir pumpada ansei cun egn agid (p.ex. anugl hidraulic). Egn anugl hydraulic e egna pumpa ca vean stimulada cun aua a ca lavura sainza energieia eastra, cunquegl c'egna part da l'aua vean duvrada sco impuls d'energieia. Igl sistem â cun egn ventil da stosch ad egn ventil da pressiùn me duas parts moviblas, e parquegl fetg cuzevel a dovra poca tgira.
- Duvrar las lingias a pumpas da sistems d'andrezs dad anavar (far nev).
- Schinumnos «Eisstupas» sco agl Himalaja (recycling dad aua da nev): Qua sa vagnir rimno l'aua digls sglatschers d'unviern ad antras temperaturas fredas a la pulvarisaziùn (igl prinzip sco tier egn canùn da nev) sa l'aua vagnir schalada an furma da turs (Stupas). Ascheia sa igl defluent digl sglatscher vagnir arcuno la paravera, sch'igl darscheala an la valada. Egn project da pilot europeic vetier dat igl par exaimpel a Pontresina.
- L'aua sa vagnir preparada cun radis UV ad egn filter da levitaziùn (par far bavevla l'aua p. ex. par la producziùn da caschiel): Cun radis ultravioletts (UV) san 99.95% da tut igls virus vagnir destrueus an pocas secundas. Igl sistem dovra poca tgira a procurescha par aua stupenta. Par far quegl e forza electrica databasegs. Quel savess vagnir gudagnieu par exaimpel cun egn indrez solar.

## Modas d'agir agl mintgagi

Egna mancàanza d'aua sen egn'alp â par consequenza blearas midadas. Ascheia dat igl betga me consequenzas par la producziùn da caschiel, da forza electrica a la tratga da biestga, mobagn ear pigl mintgagi da la sanareia. Qua tquat'ign paralelas tigl mintgagi agl partgea da las scularas a digls sculars.

Igl consum d'aua digls partgeas da la Svizra quenta tier egn digls ple òlts an l'Europa. El sche tier antocen 300 liters par gi a parsùna, noua ca bunameing la measadad da lez vean duvro par activitads agl partgea sco par exaimpel la darschantada da la tualeta, la duscha agl cuschin. Igl consum d'aua digls partgeas e peia egn factur fetg impurtànt par spargnear las resursas d'aua – amporta betga scha quegl segi sen l'alp near a tgea tier las scularas agls sculars. Par furtuna e la mancàanza d'aua ànc betg urgainta an la Svizra. Tutegna â igl vaschinadi da Mendrisio agl Tessin cumando da spargnear aua igl on 2022, cunquegl c'igl veva do egna setgira cuzevla.

## Activitat an l'instrucziùn

*Tge pussevladads d'agir par schinagear las resursas d'aua dat igl agl mintgagi?*

Las scularas ad igls sculars nodan an dus ideias. Tut las propostas vignan rimmadas agl plenum ad igl vean discuto tge avantatgs ca las masiras ân a tgenegnas ca san vagnir messas anturn digls unfànts.

### Exaimpels par masiras

- Far la duscha anstagl da far bogn
- Spargnear aua cun far la duscha (par gliez duvagn nus agl partgea la ple bleara aua)
  - o Instalar egn tjeiu da duscha ca spargna aua (ple poc deflussiùn par minuta)
  - o Redutgear igl tains da far la duscha
  - o Meter giou l'aua durànt igl savunar aint. (Tip: Ascheia sto vagnir scaldo blear ple poc'aua, tge ca spargna puspe bleara energieia a daners)
- Spegna d'aua agl bogn:
  - o Meter giou la spegna d'aua durànt lavar igls daints/savunar igls màns a.a.a.
  - o Instalar egn culem da spargnear aua (ple poca deflussiùn)
- Duvrar la tasta da spargnear tier la darschantada da tualeta
- Iert:



- Duvrar aua da plievgia par anzuar
- Anzuar las plàntas directameing giobass ved las rischs, betga sprizar da lientsch (→ ple poca vapurisaziùn)
- Anzuar la damàn bòld near la sera (→ ple poca vapurisaziùn)
- Schar crescher igl zespèt → seia or ple plàn cunquegl c'igl taratsch â umbriva
- Scurvatar las eras cun fegns tocs da lena near cun forza electrica → siainta ple plàn
- Trer aint tgòltschas a pulovers pliras geadas avànt ca lavar els. Savens tànsch'igl da luftagear la raglia sch'ella â nigns flatgs.
- Lavar:
  - Schar irla maschina da lavar per sch'ella e plagna
  - Tscheerner egn program d'eco (l'aua vean duvrada ple gî, ascheia c'igl dovrà ple poca)
  - Duvrar egna maschina da lavar efizainta partutgànt l'energeia
- Tgadafiac:
  - Lavar la salata an egna scadeala anstagl sut l'aua curainta
  - Maschinas da lavar vascheala dovrà ple poc'aua c'igl lavar giou a mòn (sch'ign amplanescha ella a lasch'ir ella agl modus d'eco)

# Ideias cuntuàntas

## Proposta par egna controla da las fegnamiras

Par egn mystery dat igl betg la schleiaziùn corecta. La parsùna d'instrucziùn controlescha pletost las raspostas digls sculars a las scularas sen la cumplexitad, l'argumentaziùn a la validitat. Vetier sa ella valitar igls schurnals d'amprender digls unfànts, las preschiantaziùns da las raspostas da la grupa sco ear igls mindmaps c'en vagnieus fatgs an las grups.

## Valitaziùn digl schurnal d'amprender


- En las infurmaziùns da las tgartas vagnidas culieadas raschunelameing cun l'amarada directiva, near coraspunda la rasposta betga propri a l'amarada?
- Â la rasposta tutgieu l'essenza raschunel a capevel, near cunsista ella da parts cun infurmaziùns nunstructuradas?
- En ear relaziùns abstractas, ca van sur igl cass singul da l'alp Curtginatsch or, vagnidas numnadas, near me realziùns directas a semplas?

## Valitaziùn digl mindmap

- En las tgartas d'infurmaziùns vagnidas urdanadas suainter tematicas a culieadas cun piliets (motiv → consequenzas) ad en vagnieus fatgs conex traversals?
- En infurmaziùns nunrelevàntas par l'amarada directiva vagnidas marcadas sco qualas near zavradas?
- Las tgartas tschannidas datan a la parsùna d'instrucziùn egn scolarimaint, sen tge temas c'igls SaS ân safocusso.
- En vagnidas notadas ulteriuras infurmaziùns near tgavazegns?
- San igls SaS preschantar quegl c'e vagnieu amprieu capevel a cun agens pleuds?

An l'anexa satgata egn exampel d'egn mindmap tier l'alp Curtginatsch (format A2 → squitscheart sco poster near duvrar digitalmeing). Igl dat dantànt betga me egna schliaziùn, mintga grupa tgata egn'atgna veia d'urdanar las tgartas a da raspunder l'amarada directiva.





Duas variàntas, co las tgartas d'infurmaziùns savessan vagnir urdanadas (saniester cugl focus sen temas sutordinos; dretg cugl focus sen expressiùns zentralas). Funtàna «cumpendi mystery», éducation21

## Debatas par saprofundar agls cuntegns

Cun l'elavuraziùn digl mystery ân las scularas agls sculars gea amprieu blear tigl tema (mancàntza d') aua, digl clima a da las alps. Tier egn debata d'egn tema ca stat an relaziùn cun quegl, san els ussa prender aint diferaintas perspectivas da diferaints acturs, crear egn atgna opiniùn ad amprender d'argumantar cun respect.

### Tema (fictiv) pussevel: «bigliac agl teritori da palé Anarosa»

Agl teritori da palé Anarosa de vagnir tschafada egnova nova funtàna, ascheia ca l'alp Curtginatsch ad oters manaschis vaschegns san vagnir providieus cun avunda aua. Cunquegl ca la funtàna an mira sche agl teritori federal schurmagieu, sto vagnir fatg egn'examinaziùn par survagnir la lubientscha. Igls menis digls acturs partutgieus van ordapar, cunquegl c'igl va pigl mantegnamaint d'egn spazi da viver periclico, mo ear pigl avagnir da la Val Schons (economeia, evitaziùn d'emigraciùn, qualitat da viver).

### Acturs pussevels

- Corporaziùn Muntogna da Schons (sameta anzemel digls vaschinadis digl conturn, e patrùna sco ear administratura da l'alp Curtginatsch a da pliras alps ainta Schons)
- La sagnùna Janine, ca lavura sen l'alp Curtginatsch
- Ufezis par la natira ad igl ambiaint digl cantùn a da la cunfederaziùn (cantùn GR "ANU" ad ufezi federal "BAFU")
- Igl pur Werner, ca radi mintg'on las sias vatgas sen l'alp Curtginatsch
- Igls manaders digl agroturissem Alp Nurdagn
- Pro Natura / WWF
- Uniùn purila grischùna
- Viamala turissem
- Manaders da fatschendas ca fan inspecziùns da l'aua da bever near da funtànas

Ulteriuras rolas:

- Manader/ra da discussiùn
- Manader/ra digl protocol
- Publicum



## Excurs «aua virtuala»

Antocen ussa vagn nus surtut safatschanto cun l'aua fisica a vasevla, cunquegl ca surtut gliez gioia egna rola pigl manaschi d'alp. Sch'ign fa dantànt egna culiaziùn cun oters secturs da la veta near cugl exterier, vean «l'aua virtuala» adigna ple impurtànta. Ear sch'ign veza betga cular l'aua or d'egna spegna, satgata igl consum d'aua ear an vivàndas, vastgadira near telefonets, cunquegl c'igl dovrà aua par lur producziùn. Latier vean l'aua ear tschufargneada a vapurisada durànt quels prozess.

Sch'ign cumpra egn liter latg d'egn manaschi convenziunal c'importe scha blear pavel digl exterier, e par l'anzuada da la cultivaziùn a par l'elavuraziùn digl latg gea vagnieu duvro antocen 1000 liters aua. Ear scha la Svizra à avunda resursas d'aua, vean l'aua virtuala tier egn problem, sch'igls noss products darivan da liacs noua ca l'aua e stretga. Par l'anzuada vean l'aua prida da flems near da l'aua suterana, ascheia ca quella mànca puspe tigls carstgàns a la natira agl liac. Sch'egna vatga sen l'alp Curtginatsch sanutrescha dantànt dad earvas ca creschan agl liac, e igl consum d'aua virtuala clerameing ple pintg. Fazit: Scha pussevel cumprar aint products locals, tigls quals ign ancanuscha las cundiziùns da producziùn.

## Activitads an l'instrucziùn

*Quànt bleara aua virtuala satgata an egn product digl mintgagi da las scularas a digls scularas?*

Las scularas ad igls scularas vigan animos da nudar igls pass da producziùn d'egn product da lur mintgagi ca dovrà aua virtuala. Retscheartgas agl internet san gidar da mussar, quànts liters aua ca vigan duvros pigl product tscharnieu.

## Pussevladads d'agir

- **Cumprar aint regiunal a stagiunal:** Tgi ca cumpra puma a verdira regiunala a stagiunala, sa redutgear igl fastez d'aua. Scha puma a verdira vigan impurtadas digl exterier d'egna teara cun mancàanza d'aua, munta quegl, c'igl eara databasegs d'anuar artifizialmeing, schagea ca la teara pitescha dad egna mancàanza d'aua.
- **Cumprar aint biologic a fair:** La tschufargneada da l'aua da bever antras l'agricultura industriala magna tier egn mancàanza d'aua. Tier products convenziunals vigan savens duvros cultems cemics a sintetics, ca magnan tier egn tschufargneada digl taratsch a da l'aua. Tier vivàndas produtgeadas biologicas a fairas e'gl betga, near me limito, lubieu d'utilisar cultem artifizial near mieds da schurmagear plàntas.
- **Bever aua da spegna:** Igl dat concerns ca cumpran gràndas surfatschas da tearas par duvrar las funtànas par l'aua amplanida an buteglias, durànt c'otras regiùns agl sid global peardan lur acess tier l'aua schubra. Plenavànt donegia igl transport da las buteglias da plastic near da glas antras sia producziùn da CO<sub>2</sub> igl ambiant massiv.
- **Magliear daple nutrimaint vegetal:** Antras la producziùn da pavel pigls animals satgatan an media radund 15'000 liters aua virtuala an egn kilogram tgarn d'armaint. Surtut la tratga d'animals da massa e egn grànd problem tge ca partutga las auas. Mo ear sistems ecologics d'aua frestga sensibels vigan destrueius antras quegl (p.ex. antras la cultivaziùn intensiva da soja an la Brasilia).
- **Magliear ple pocas vivàndas ultraelavuradas:** La producziùn da vivàndas ultraelavuradas sco p.ex. fastfood, dovrà par la producziùn zund blear'aua.
- **Evitar foodwaste:** Mintg'on fieragn nus davent 11 miliùns tonas vivàndas. Ascheia satschainta ear l'aua virtuala agl rumient. Tgi ca planisescha sias cumpras, sa peia spargnear aua. Mademameing sa igl damagiear ear vagnir partgieu (p.ex. antras las stgafas fredas publicas da Madame Firgo) a savens san vivàndas vagnir maglieadas suainter la data da scadenza.
- **Redutgear pulpier a plastic:** Betga me la producziùn da las vivàndas sezà dovrà aua, mobagn ear lur pacatadi. Sch'ign vut peia spargnear aua an que gro, san ign cumprar products cun poc pacatadi. Ear pulpier reziclo a la separaziùn da rumient consequenta sa gidar sa sminuir igl agen fastez d'aua.
- **Dar egna lùnga veta a la vastgadira:** Ein t-shirt da mangola dovrà par sia producziùn anturn 2'500 liters aua virtuala ad egna jeans 11'000 liters. Duas tearzas da la mangola segl mund vean cultivada cun agid d'anzuadas artifizialas an regiùns setgas sco par exaimpel an l'Asia zentrala. Gi'e peia impurtànt ca



la vastgadira vegi egna lùnga veta – Cumprar aint an stizùns da second hand, sen fieras da plugls near tier events da baratar vastgadira gida fetg.

- **Duvrar igl transport public near igl velo:** la producziùn d'egn auto dovrà antocen 400'000 liters aua virtuala a par la producziùn da diesel vean runco igl göld tropic, ca gioja egna rola impurtànta par la zirculaziùn da l'aua globala. Antras igl diever digl velo, digl transport public near digl car-sharing sa ign far anzatge bien par las nossas resursas d'aua.
- **Reparar a partgir:** Gudagnear materias primaras par telefonets dovrà enorm bleara aua. Egn'otra variànta co d'agir ancùnter igl òlt consum d'aua e da partger igl telefonet near oters objects pigl diever da mintgagi cun oters, dar anavànt els sch'els vignan betga ple duvros, near d'igls schar reparar anstagl da cumprar nov.
- **Vurdar sen contexts regiunals:** Dezisiv e adigna, co ca las premissas ecologicas a sozialas en agl liac da producziùn. Cacau dovrà par exaimpel fetg bleara aua par la producziùn. Cunquegl c'el vean cultivo surtut an regiùns cun bleara prezipitaziùn e egn consum òlt da tschiculata nign problem agl conex cun l'aua.
- **Sufizienzia:** Scha nus consumagn saptgaint me quegl c'e verameing nezessari par egna bùna veta anstagl igl maximal pussevel, savagn nus schinagear igl ambiaint a duvagn mains aua virtuala. Quegl mùnta betga, c'ign sto desister da tut, mobagn da tschearner cunzaintmeing near partgir a baratar la roba.

## Aprofundaziùn

Dossier da tema «Wert des Wassers», éducation21.

<https://education21.ch/de/themendossier/wert-des-wassers> (abgerufen 20.3.2024)

Mied d'instrucziùn «Querblicke: Virtuelles Wasser», L. Wüst & C. Lischer-Wenger u.a., 2016, Ingold Verlag.

<https://education21.ch/de/querblicke-virtuelles-wasser> (abgerufen 17.1.2024)

Figl da lavur «Unser unsichtbare Wasserverbrauch», Stadtwerke Erfurt.

[https://www.stadtwerke-erfurt.de/pb/die\\_swe/die+swe/fuer+erfurt/medien+und+materialien#anker116065](https://www.stadtwerke-erfurt.de/pb/die_swe/die+swe/fuer+erfurt/medien+und+materialien#anker116065)  
(Dokument swe\_arbeitsblatt\_virtuelles wasser\_quer-0924.pdf, abgerufen 17.1.2024)

Infurmaziùns declaradas semplas tier aua virtuala.

<https://klassewasser.de/content/language1/html/924.php> (abgerufen 16.1.2024)



# Funtànas

## Videos

- <https://www.schweizerbauer.ch/politik-wirtschaft/darum-ist-die-alpwirtschaft-in-gefahr> (abgerufen 19.10.2023)
- <https://www.srf.ch/audio/wetterfrage/eisstupas-kuenstliche-gletscher-gegen-trockenheit?id=12353998> (abgerufen 18.10.2023)
- <https://www.srf.ch/news/panorama/folgen-des-klimawandels-die-alpen-werden-immer-gruener> (abgerufen 19.10.2023)
- <https://www.srf.ch/news/schweiz/trockenheit-und-hitzewellen-der-wassermangel-macht-den-schweizer-alpen-zu-schaffen> (abgerufen 17.10.2023)

## Internet

- <https://klassewasser.de/content/language1/html/924.php> (Abgerufen 16.1.2024)
- <https://next.blick.ch/schweiz/graubuenden/testanlage-im-engadin-eroeffnet-innovation-vom-himalaya-soll-schweizer-gletscher-retten-id16342948.html> (abgerufen 18.10.2023)
- <https://wfd.de/thema/fleisch-milch> (abgerufen 17.10.2023)
- <https://wfd.de/thema/wasser-sparen> (abgerufen 17.10.2023)
- [https://wiki.bildungsserver.de/klimawandel/index.php/Albedo\\_\(einfach\)](https://wiki.bildungsserver.de/klimawandel/index.php/Albedo_(einfach)) (abgerufen 9.10.2023)
- <https://www.bafu.admin.ch/bafu/de/home/themen/klima/dossiers/hitze-und-trockenheit-im-sommer-2022.html#-1899278820> (abgerufen 9.10.2023)
- <https://www.bafu.admin.ch/bafu/de/home/themen/wasser/fachinformationen/zustand-der-gewaesser/hydrologie-und-klimawandel.html> (abgerufen 11.10.2023)
- <https://www.berghilfe.ch/geschichten/zuegeltag-auf-der-alp> (abgerufen 9.10.2023)
- <https://www.berghilfe.ch/was-wir-tun/aktuell/wasser-der-motor-der-alpwirtschaft> (abgerufen 17.10.2023)
- <https://www.diegruene.ch/artikel/alpwirtschaft-schweiz-alm-zahlen-fakten> (abgerufen 17.10.2023)
- <https://www.fhgr.ch/fh-graubuenden/entwicklung-im-alpinen-raum/institut-fuer-bauen-im-alpinen-raum-ibar/projekte/ice-stupas-im-engadin/> (abgerufen 18.10.2023)
- <https://www.myclimate.org/de-ch/informieren/faq/faq-detail/was-ist-der-treibhauseffekt/> (abgerufen 15.1.2024)
- <https://www.myswitzerland.com/de-ch/planung/ueber-die-schweiz/brauchtum-und-tradition/das-alpleben-wo-berge-versetzt-werden/> (abgerufen 17.10.2023)
- <https://www.nccs.admin.ch/nccs/de/home/sektoren/wasserwirtschaft/auswirkungen-auf-den-wasserhaushalt.html> (abgerufen 11.10.2023)
- <https://www.nccs.admin.ch/nccs/de/home/sektoren/wasserwirtschaft/auswirkungen-auf-den-wasserhaushalt/schneelangletscher.html> (abgerufen 11.10.2023)
- <https://www.nccs.admin.ch/nccs/de/home/sektoren/wasserwirtschaft/auswirkungen-auf-den-wasserhaushalt/fliessgewaesser.html> (abgerufen 11.10.2023)
- <https://www.nccs.admin.ch/nccs/de/home/sektoren/wasserwirtschaft/auswirkungen-auf-den-wasserhaushalt/seen.html> (abgerufen 11.10.2023)
- <https://www.nccs.admin.ch/nccs/de/home/sektoren/wasserwirtschaft/auswirkungen-auf-den-wasserhaushalt/grundwasser.html> (abgerufen 11.10.2023)
- <https://www.nccs.admin.ch/nccs/de/home/sektoren/wasserwirtschaft/auswirkungen-auf-den-wasserhaushalt/gewaesseroekologie.html> (abgerufen 11.10.2023)
- <https://www.nccs.admin.ch/nccs/de/home/sektoren/wasserwirtschaft/auswirkungen-auf-die-wasserwirtschaft.html> (abgerufen 11.10.2023)
- <https://www.powernewz.ch/rubriken/energie-sparen/wasser-sparen-im-haushalt-die-12-wichtigsten-tipps/> (abgerufen 15.1.2024)
- <https://www.schweizerbauer.ch/regionen/zentralschweiz/tessin-wasser-wird-knapp> (abgerufen 15.1.2024)
- <https://www.srf.ch/meteo/meteo-stories/die-wetterbilanz-2023-zweitwaermstes-jahr-und-deutlich-zu-nass> (abgerufen 17.1.2024)
- <https://www.srf.ch/news/schweiz/schneemangel-und-hitze-sac-huetten-droht-wegen-wassermangel-die-schliessung> (abgerufen 18.10.2023)
- [https://www.stadtwerke-erfurt.de/pb/die\\_swe/die+swe/fuer+erfurt/medien+und+materialien#anker116065](https://www.stadtwerke-erfurt.de/pb/die_swe/die+swe/fuer+erfurt/medien+und+materialien#anker116065) (Dokument «swe\_arbeitsblatt\_virtuelles wasser\_quer-0924.pdf», abgerufen 17.1.2024)
- <https://www.swissinfo.ch/ger/wissen-technik/wassermangel--warum-das-blaue-gold-der-schweiz-unter-druck-kommt/48589382> (abgerufen 18.10.2023)



# Lavur an grupa

## Istorgia d'introducziùn

Igl gi leava ad igl fa plànsieu gis sen l'alp Curtginatsch. Agls bietgs e'gl dantànt tut stgir. Sch'igls luvraints ân durmieu giou oz? Tutanegna schlupeg'igl dadòlt davo igl nuegl ad egn pintg nivel da fem aszenda. Igl schlupagear samida an egn rumplanar a las cazolas an la tigia d'alp s'anvidan. Schon prest antscheva la producziùn da latg a da caschiel.

La sagnùna Janine ad igl pastur Marc en leads, c'els ân avunda forza electrica pigl manaschi d'alp. Mo igl eara betg adigna ascheia c'els vevan da far diever d'egn generatur da diesel ca fa canera a tofa. Antocen la stad passada â egna pintga ovra hidraulica agl dutg pussibilito la producziùn da forza electrica CO<sub>2</sub> neutrala. Ussa cura dantànt bunameing nign'aua ple. Mo egn dutg setg stat betga me an relaziùn cun la producziùn da forza electrica, mobagn fuss ear igl motiv partge c'igl Laurin savess betga ple cumprar igl sieus pànet preferieu cun caschiel d'alp an la pastarnareia Merz a Cuira.

## Amparada directiva

Noua e l'aua a partge savess igl Laurin betga ple cumprar igl sieus pànet cun caschiel d'alp, sch'igl dutg sen l'alp Curtginatsch tschassass?



Pànet da caschiel d'alp da la pastarnareia Merz a Cuira. Funtàna: Parc natural Bavregn

## Leztga

1. Cumpartged las savundàntas rolas agl team:

Secretari:a	Noda segl pulpier da flipchart las cunstataziùnsimpurtàntas a la schliaziùn da la grupa.
Tgirader:ra da tains:	Tegna an ìl igl tains ca stat a disposiziùn.
Plidader:ra da la grupa:	Preschainta la schliaziùn a la classa.
Guardian:a da la grupa:	Sirescha, ca tut igls cumembers da la grupa vignan a pled.
2. Ligid l'amparada directiva. Ella gida a vus suainter da vagnir anavànt ple speart.
3. Studagead anzemel las tgartas d'infurmaziùns a sortad ellas ascheia, c'igl fa sen:
  - a) Tge tgartas satractan d'anzatge samagliànt?
  - b) Tge tgartas statan an conex l'egna cun l'otra? Culiead cun la corda.
  - c) Dat igl tgartas d'infurmaziùns, c'âñ da far nut cun l'amparada directiva? Mated ellas da la vart.
4. Tge tgartas gidan a vus da raspunder l'amparada directiva? Urdanad ellas segl flipchart a catad anzemel egna schliaziùn a buca.
5. Raspunded l'amparada 2 agl schurnal d'amprender. Igl near la secretari:a scriva sei la rasposta segl pulpier da flipchart. Nudad ear las argumentaziùns par las vossas raspostas!
6. Igl near la plidader:ra preschainta las vossas raspostas a la classa.
7. Raspunded mintgegn par sasez l'amparada 3 agl schurnal d'amprender.



# Schurnal d'amprender

Noua e l'aua a partge savess igl Laurin betga ple cumprar igl sieus pànet cun caschiel d'alp, sch'igl dutg sen l'alp Curtginatsch tschassass?

1. La mia suposiziùn da l'antscheata: La mia rasposta sen l'amparada directiva (sa easser egna rasposta c'e vagnida discutada an la classa). Argumainta!

---

---

---

---

2. La nostra rasposta finala

---

---

---

---

---

---

---

---

3. Quegl ve jou amprieu:

---

---

---

---

---

4. Tge savess jou midar agl mieus mintgagi par evitar egna mancàenza d'aua?

---

---

---

---

---

